



SchlössliTimes

Ussgob 20

Januar 2016

In dere Ussgob:

Oktoberferscht	1
Probeweekend	2
Heimspiil 2015	3
Chacheliball	4
Blaggeddeussgob	5
Gülläfäschtival Hilzingen	6-7
9mol entweder oder.../	8

Immer ufem laufende uf:

www.schloessli-schraenzer.ch

Fasnachtsieber

D'Blaggeddeussgob isch dure, s'Sujet isch klar
Z'Aesch bi Gott isch Fasnachtszyt, s'isch wunderbar
D'Schlössli händ s'ganze Johr güebt und gschliffe
Jetzt chunnt d'Zit vom gniesse, me hört dr Mario gli piffe.

Istoooh heisst denn, dr Puls goht uff
mir präsentiere s'neue Kostüm und spiile e huffe
Drei Täg Fasnacht, die schönscht Zyt im Johr
mit däm geile Huffe, es isch meh wie wohr.

Wieder gits neus z'Aesch an dr Fasnacht
die Verantwortliche händ e super Job gmacht,
s' git Veränderige und Wächsel, so isch s'Läbe
d' Schluuchete chunnt guet und s'Dorf wird bebe.

D'Tradition vo dr Fasnacht die muess me pfläge
ob Jung oder Alt, ob inere Gugge oder uf Waggiswäage,
z'Aesch isch mr uff guetem Wäg, me isch mit Härzbluet drbi
es bruucht Alli, viel Fasnächtler und no viel mehr Passivi.

Drum liebi Lüt vo noch oder au färn
sehn mir euch Alli im Februar ganz gärn,
nid irgendwo ufere Insle im warme am Strand
sondern z'Aesch an dr Fasnacht am Stroosserand.

Matti-Babbe-Fischi

Oktoberfescht im Schlösslilokal, 03. Oktober 2015

Wieder hets im Schlösslilokal gheisse „o' zapft isch"! Bi speziellem Oktoberfescht Bier und Brezn hämmer e gmüetliche Obe iglüte. Etliche Bsuecher händ sich in Schale gworfe und s'Dirndl oder d'Läderhose montiert. Bi typischer Oktoberfescht Musig het me e gmüetliche Obe mitenander gnosse. Je später dr Obe desto meh het sich s'Lokal gfüllt, aber nid überfüllt. S'Bier isch gflosse und d'Stimmig isch super gsi.

Au wenss vielleicht nid soviel Lüt gha het wie in andere Johre, händ sich die Awäsende nid lo irritiere und händ e tolle Obe in durchus gsittetem Rahme verbrocht. E witermol hämmer e glungen Alass in unserm Lokal, wo definitiv meh isch wie nur e Proberuum, organisiert. Witeri Aläss wärde bestimmt folge. Mir löhnds Euch gnueg fröh wüsse wenn wieder öbbis astoht.

Matti-Babbe-Fischi

Probeweekend Hottwil, 17./18. Oktober 2015

Am 17. Oktober 2015 hän d Vorbereitige fürs Heimspiil und die neu Saison mit em Probeweekend in Hottwil agfange. Nach dr Akunft het uns d Muko scho mit kleine Auge empfangt, sie sin scho e Daag vorhär gange, das seit wohl alles ;-). Imene ehemalige Schuelhuus hän d Regischerprobe scho ziemlich frieh agfange. Aber das isch für uns natürlich kei Problem, ei, zwei Bier und denn lauft. Zwei neu Stückli hän mir afo iebe und scho rächt schnäll in dr Gsamtprob könne spiile. Me dörf sich druf freue ☺

Nach em Mittagessig sin d Probe witergange bis zum Znacht, wo uns Freiwilligi bekocht hän. Nomol e riese "Dank dir Tausig" für das! E "Highlight" isch natürlich die jöhrliche Taufi gsi, wo au ich ha dörfe über mi ergoh loh. Als Popeye und Olivia hän mir uns s Mitglieder-Diplom erkämpft. Sigs e Täller Spinat mit Knoblauch (oder eher umgekehrt!) abschlinge, Bier abschütte, Shots trinke, oder enand mit Wasser aspucke (nei das wär ebbe eigentlich nid d Idee gsi...), mir hän uns tapfer gschlage und sin mit em beriehmte berüchtigte Aescher-Stiefel definitiv ufgno worde.


Nach dr Taufi isch s Fescht erscht richtig los gange. Für die einte biz meh und die andere eher weniger. S kas halt scho emol geh das me iischloft. Aber mir wüsse jo alli, dass das nid eso gschiggt isch in unserer Gugg. Dr Béhé het miese dra glaupe und isch unterm Berg vo Kleider vergrabe worde.

Am Sunntig sin mehr oder weniger alli wieder parat zum iebe gsi. D Quote wo nid het möge het sich uf e absoluts Minimum beschränkt. Aber au do kunnt me nid eifach so drvo. Mitere spontane, musikalische Iilag het s Euphi und s Posune Regischer dr Yves sanft probiert zwecke. Aber au dr Wanderer het nüt brocht...

Zum Schluss hets no e Gsamtprob geh zum uns ufs Heimspiil iistimme. Und das wärs vom Probeweekend scho wieder gsi.

Dange fürs Organisiere und die tolli Taufi, wo ich bestimmt nid vergässe wird!

Anina



Heimspiil, 09. Novemeber 2015

Wär hätt im Juni 2005 dänggt, dass mir in Aesch e so erfolgrichs Guggemusig Fest könne organsi-siere. Für mi isch es au nach über 10 Joor im Heimspiil OK immer wieder e Herusforderig und e gwüssi Aspannig isch in de paar Täg vor em Fescht spürbar.

Mit em Start vom Ufbau wo jewiils am Frytig am 10i am morge los goht, merkt me jedoch, dass e gwüssi „Ruth-iine“ vorhande isch. Zerscht heisst, Teppich us-rolle, mit Doppelkläbband befestige und usrichte. Aschliessend könne mir die räschtlische Arbete noch und noch erledige; Bühni ufbaue, Bar ufstelle, Kaffi-Stübli iirichte. Es git einiges wo gmacht wärde muess. Am oobe gseht d Halle denn scho relativ startklar us für s grosse Fescht. Zyt also für d Hauptprob. Super es het alles klappt. Träffpunkt am Samschtig am 3i. Denn heisst die räschtlische Klinigkeite erledige, so dass mir am 6i parat sind, denn am 6i findet dr Sponsoreapéro statt und mir spiele nomol 2 Lieder.

20 Minute vor de Halleöffnig trifft sich s ganze OK und es wärde d Funkgrät verteilt. Ohni Funkgrät wäre mir ufgschmisse. E paar Minute vor de 7i mach i mi uf em wäg zum Iigang. Alles parat? Oobekasse, iigrichtet? Security isch do? Pünktlich am 7i wird per Funk mitteilt, dass 10. Heimspiil eröffnet isch.

Die erschte 2 Stunde verlaufe relativ ruhig und über Funk ghört me praktisch nüt. Je später am Oobe desto hüffiger gits Sache z erledige und me ka das problemlos via Funk koordiniere. Trotz allem het me Zyt s Fest z gniesse und mit em einte oder andere wo me scho lang nüm gseh het azstosse.

Die musikalisch Unterhaltig am Oobe liefert d Partyband die Grafenberger us em Ruum Stuttgart und die diverse Guggemusige vo noch und färn. Dr us unser Sicht Höhepunkt isch ganz klar unsere Ufritt kurz nach de 12i. Me merkt, dass sich d Halle no e biz- zeli mehr füllt und unseri, Fründe, Familie und Gugge-Liebhaber uns ghöre wänn. E liichti Nervosität isch bi vielne spürbar, aber nach em obligate Shot wo verteilt und gext wird gohts allne besser und mir sind uf e Punkt parat. Nach nit emol 25 Minute isch es denn au scho wieder vorbi und mir stürze und zrug uf unseri Pöschte und luege, dass bis zum Ändi vom Fescht (halb 3i) no alles riibigslos lauft.

S Ufruume isch dr unschöni Teil vom Fescht, aber ghört halt drzue. Do die meischte kräftig apacke lauft s Meischte wie am Schnürli und d Halle hän mir am halb 7i könne abgäh.

YES, Gschafft und jetzt gohts ab ins Pub zum Nachspiil !

Fabian Baumann

Im OK für d Finanze und s Ticketing zueständig



Chacheliball Erlinsbach, 28. November 2015

Nach em astrengende Heimspiil wo mir wie die wilde hän miese chrapffe, hän mir uns alli gfreut uf dr Chacheliball. Eifach an e Fescht zgo und zgnesse ohni miese immer wieder dra zdenge das mir no die ganzi Nacht miese ufzruume. So hän mir uns alli am Samstag Zobe voller Vorfreud im Schlössli Lokal troffe. Dört hets no schnell es Bierli oder e Frosch gä, bevor mir dr Ahänger mit unsere Instrument glade hän und uns an unseri agstammte Plätz in Bus gsetzt hän. D Stimmig isch super gseh, scho im Bus. Wo mir dört aho sin hän alli ihri Bändeli und Getränkebon becho und hän sich ufem Gländ verteilt. Die einte sin direkt ind Halle, die andere dusse ins Chachelizelt und nomol anderi sin bim Esse agstande. Mir hän meh wie gnueg Zyt ka bis zum Uftritt, do mir erst am halbi 12i hän miese go spiele. Also sin die meiste uf d Suechi gange nach de berühmte Chacheli voll mit Lutz. Im Chachelizelt hän mir jedoch leider miese feststelle das es am Chacheliball keini Chacheli meh git. Uf nochfrog het meh uns gseit dass die entweder alli kaputt gange sin bim letschte mol oder eifach verschwunde sin. Leider isch somit ei Highleit vom Chacheliball leider nüm vorhande gseh. Doch mir hän uns vo dem nid lo d Stimmig vermiese und s Fescht anderscht gnosse. Einige hän sich mit normale Lutz zfriede gä und nomol anderi hän de andere grossartige Guggene in dr Halle zuglost. Dört isch d Stimmig richtig guet gseh und meh het richtig chönne Party mache.

Wo mir den ändlich an dr Reihe gseh sin hän mir uns gfreut uf dä Uftritt. Meh het jedoch gmerkt das alli chli Nervös gseh sin, do mir vor ka hän unseri neue Lieder s erschte mol zspiele. Leider isch dä Uftritt nid ganz so gseh wie mir uns en Vorgstellt hän. Öb das jetzt an dr Nervosität glege isch oder will d Entdüschtig so gross gseh isch das es keini Chacheli Lutz gäh het, isch bis jetzt nid klärt. Klar isch eifach dass mirs troztdäm luschtig ka hän und das Fescht gnosse hän. Mir freue uns scho uf die nächste Feschter wo mir gön.

Euri Schlösslis

Corinne



Aescher Fasnacht 2016:

04. Februar	Kinderumzug - 14h00
07. Februar	Fasnachtsumzug - 14h00
08. Februar	Faggelumzug und Obesträich - 19h00
09 Februar	Schluuchete mit 16 Guggene uff 4 Bühne im Dorf -19h00
14. Februar	Fasnachtsfüür - 19h00 Träffpunkt Restaurant Mühle

Blaggedde-Ussgoob, 9. Januar 2016

AESCH schiebt nit... das isch s'Sujet vo dr Aescher Fasnacht 2016.

Wie jedes Jahr hämmer uns bim Tipu z'Aesch droffe. Dr eint oder ander het sich vorhär no 1, 2, 3 oder au 4 Apéroli gnähmigt. Me gönnt sich jo sunscht nüt. Am halb 5i isch Träffpunkt gsi, me het no ein zämme gnoh und gege die viertel ab 5i hets denn s'erscht Mol das Jahr kheisse:

YYYYSTOOOOOH! Also hämmer uns uf dä langi Marsch zur Gmeind füre gmacht, wo au i dämm Jahr wider e Zält ufgestellt worde isch. Mir händs gschafft e ganzes Lied z'spiile (oder vilicht sinds sogar zwei gsi).

Im Zält acho hämmer uns denn zu de Guggene gstellt, wo bereits dört gsi sind und händ no uf die räschliche Guggene gwartet.

Alli zämme hämmer denn e paar Lieder zum Beschte gäh und s'Zält e erschts Mol zum koche brocht. Nachär hets denn für uns erscht emol kheisse Pause bis am halber 10i. Jede het chönne mache, was är will. Die meischte sin im Zält azträffe gsi und me hets glatt kha mitenander.

Die neu Blaggedde isch präsentiert worde, dr Künschtler het no si obligatorische Spiiiitsch ghalte, d'Guggne hän gspiilt und d'Bänd het zwüschedrin für die musikalische Unterhaltig gsorgt.

Gege die 10i hämmer denn no unsere Uftritt kha. S'Zält isch guet gfüllt gsi und s'Publikum guet druff. Nach uns hän no d'Pflumepfupfer e paar Lieder zum Beschte gäh und für e super Stimmig gsorgt. Nachär isch es denn guggetechnisch fertig gsi und d'Schloss-Buam hän drfür gsorgt, dass me no e chli het chönne s'Tanzbei schwinge und me nit het miesse flüschtere, wenn me sich het welle unterhalte.

Alles in Allem isch es wider emol e glungene Obe gsi. Es isch immer wider schön, z'Aesch bi Gott z'feschte mit däne Lüt, wo au die drey scheenschte Aescher Däg usmache: D Aescher Fasnachts-Kollege und-Koleginne (aka Feschtbriedere und –schwöschtere).

Fabian



GÜLLÄFÄSCHTIVAL 16.01./17.01.2016 in Hilzingen

Träffpunkt isch am 13h45 im Schösslilokal gsi. D'Täsche sind packt und d'Instrumänt bereit zum verlade gsi. Will dr Hörb das mit em Instrumänt verlade scho so guet druff het, het me sich no e Fröschli oder e Bier an dr Bar gönnt. Dr Car isch denn au scho cho und mir händ s'Gepäck verstaut und sind igstiege. Jede het sich am agstammte Platz breit gmacht und sich mental uf die zweistündigi Fahrt ins Dütsche vorbereitet. Die „hinterschti Reihe“ het no e Überraschig füre Räscht gha... Für dr richtig Sound Sorge sie jo scho sit Johre. Aber jetzt händ sie zämmegelegt und e neu Box kauft und mitgnoh. S'Highlight isch e Liechtalag „on Top of the Box“ gsi. Me isch sich vor cho wie inere Disco und d'Stimmig isch super gsi! Nach knapp 3 Stunde fahrt simmer in Hilzingen, unwit vo dr schwiizer Gränze acho.



Als erschts hämmer s'Hotel bezoge, denn langsam sind d'Schlössli usem Alter dusse wo me sich ine Massenunterkunft zwängt. Churz druffabe hets denn au scho gheisse, Instrumänt und Larve undere Arm und ab ins Zentrum.



Denn am siebeni am Obe isch e Nachtumzug agstande. Es isch doch sehr chalt gsi und afo schneie hets au no. Vielleicht hets au wäge däm nur wenig Lüt am Stroosserand gha, und dä Umzug isch meh zunere Marschprob vercho... was jo au gar nid so schlächt gsi isch für uns. Nachem Umzügli hämmer paar Stunde Zit gha zum uns unters Volk z'mische. Es het e grosses Zält mit ere Guggebühni gha und verschiedenschtig Äss und Trinkständ. Imene Schopf het me chönne öbbsi Trinke, oder Broathördöpfel und e Worscht ässe... au wens komisch tönt, guet isches gsi. E grossteil vo de Schlössli het me denn aber au scho bald im Barzelt atroffe. S'Zält isch voll, d'Priise tief und d'Stimmig super gsi! Mir händ an däm Obe denn natürlich au no Musik gmacht. Z'erscht dusse uff dr Hofbühni und nach Mitternacht im Grosse Zält. Mir händ wirklich super Sound gmacht und dr Mario het e riise Freud gha. In so Momänt weis me wieder worum mr s'ganze Jahr üebt. D'Stimmig isch am choche gsi... und verusse isch mr fascht verfrohre! Nachdäm mir d'Instrumänt im Ahänger versorgt händ, isch doch e Grossteil vo dr Gugge richtig Bett ins Hotel, während die Andere nomol ans Fescht sind.

Vom höre säge het vorallem dr Hörb nomol vollgas gäh und isch ufere Wälle durs Barzelt gsurft! Aber am halbi drei isch denn scho fertig gsi und d'Lichter sind us. What the hell... aber d'Schlössli wäre jo nid d'Schlössli wenn si sich nid öbbis ifalle loh hätte. Churzumm het me die neu Soundbox useholt und s'Hotel ine Partyhuus umfunktioniert. Sauglatt sölls gsi si... usser für die wo scho pennt händ... am Presidente isches denn z'bunt worde und er het sich ufe Wäg zud de fiirende im EG gmacht. Sie Blick söll eidütig gsi sii und me het denn au grad gfolgt und d'Musik ussmacht. Bis uf e Posunesolo vom F.B. isches denn au ruhig bliibe für die letschte Nachtstunde.

Schlössli-Schränzer on Tour 2016

04. Februar	Bartliumzug Brunnen SZ
06. Februar	Bärefels Waggis Waagetaufi
07.-09. Februar	Fasnacht Aesch
16. Februar	Fasnacht Basel
20. Februar	Cherus Gälti
28. Februar	Bummel

Nacheme feine Zmorge hämmer uns wieder ufe Wäg zu dr Feschmeile gmacht, wo mir am 11h30 als erschti Gugge e Ufftritt gah händ. Mir händ uns bi öbbe 35 Zueschauer (Hälfer hinter dr Bar inklusive) dörfe usstobe. Trotzdem hämmer gueti Musig gmacht und d'Stimmig isch wieder guet gsi. Nachere Verpflägigspause und bi wächseldne Bedingige... Schnee... Sunne... Schnee... Sunneschnee... hämmer uns in Partybus begäh in dr Hoffnig dases chli wärmer isch dört inne. Genau zwei Minute isch e Teil vo de Schlösslis in däm Buss gstande und denn hets gheisse „Hüpfe an Ort“! Zum Takt vo dr Musig hämmer dä Bus zum schaukle, schwanke und hüpfe brocht © Zum losrolle hets nid ganz glängt...Grandios spassig isch das gsi und warm hämmer au wieder gha. Denn hämmer uns an unsere Startplatz für dr astehendi Jubiläumsumzug uffgmacht. Die churzi Wartezeit händ sich einigi mitere spontane Jam Session verchürzt, wieder anderi händ sich mit ere Schneeballschlacht warm ghalte. Gli scho isches losgange und mir händ die glichi Route wie am Vorobe nomol abmarschiert und debi musiziert. D'Sunne het gshiine und es het au dütlich meh Lüt am Strosserand gha wie bim Nachtumzug. Nachem Umzug hämmer d'Instrumänt nomol zwüsche glageret und grüpliwiis hän mir uns wieder ufem Feschtgländ verteilt. Denn hets nomol gheisse zämme risse und e letschtmol guete Sound abziefere für das Weekend. S'Wätter het sich nomol g'änderet und in starkem Schneegestöber hämmer nomol die alte und neue Lieder zum beschte gäh! Au dä Ufftritt het wirklich Spass gmacht und s'Publikum hets au gnosse. So hets ämel ussgseh ;-)

Denn hets au scho wieder gheisse, Instrumänt veruume und istiige. Z'friede aber doch müed hämmer uns wieder ufe Heimwäg gmacht. Dr Busfahrer Edi het no paar Schänkelchlopfer, wo nid emol soooo luschtig gsi sind, zum beschte gäh. Es isch merklich ruhiger gsi wie uff dr Hifahrt, was aber niemer wirklich het chönne überrasche.

E wifers tolls und sehr luschtig Vorfasnachtswweekend isch verbi. Me cha säge mir sind parat und d'Fasnacht cha cho! D'Vorfreud stigt uff all Fäll!

Matti-Babbe-Fischi



9mol entweder oder mit... Nicole « Nicci » Leimgruber

Zoggeli oder Schueh?

Zoggeli. Freu mi jetzt scho weni wieder
dörf dri schlüpfe :-)

Konfetti oder Röppli?

Konfetti *schäm*
I sags glaub in 10 Jahr no „falsch“

Harlekin oder Waggis?

Waggis

Pauke oder Trumpete?

Am liebste natürlich „mit Pauken und
Trumpeten“ ;-)
Aber i bi sehr glücklich mit minere
Trumpete :-D

Schnipo oder Hörnli mit Ghacktem?

Schnipooo!!

Vorne im Car oder hinde im Car?

Hinde näbem Fische!

„Wanderer“ oder „Baschi“?

Momentan no Baschi, wili de Wanderer
eifach noni cha :-/

(Waaaaaaas???? Anmerkung der Redaktion)

Polonaise oder „Line Dance“?

Line Dance mit de Schlössli

Kaffi Lutz oder Bier?

Kaffi Lutz



Leserbriefe, Inseratenbestellungen, Artikel,
Anregungen, Kritik, Lob etc. an:
info@schloessli-schraenezer.ch

Merci beschtens
Matti-Babbe-Fische

www.schloessli-schraenezer.ch